



Kerwesprouch vun Kinsteere



Königstädter's alte Kirche

1985

Is es Johr schun fast zu End
do reibe sich die Kerweborsch die Händ.
Es wern viel scheene Sitzunge gemacht
un die Kerb debei uff die Boa gebracht.
Was manchem vun aich is passiert,
des werd vun uns gleich registriert.
Dann werd dodraus en Spruch gemacht
und aich hier jetzte vorgebracht.
Hert mir gut zu ihr liewe Leit
in Kinsteere is jetzt Kerwezeit.



Drum Kellner schenk die Gläser voll Woi
Kinsteerer Kerb soll unser soi.

Es is veel uff de Welt passiert,
un mer howwe aach alles schee notiert.
Do war die Sach mit dem Woi
do dun die Winzer jetzt Glühkohl enoi,
un saache dann de Leit so duffdisch
des is e Spätles fer zwaa Mark un fuffzisch.
Was mer sunst noch hot geheert,
des hot iwverall die Ruh gestehrt,
Uff em Fluchhafe finge die Bombe o zu knalle
un uff de gonz Welt sin die Fluchzeich vum Himmel gefalle.
Ihr Leit behalt awwer eier Ruh
aach wenn die Katastrophe nemme zu.

Drum Kellner ...

Was is dann sunst noch in de Welt geschehe
de Bumm-Bumm-Boris konnt mer Tennis spiele sehe.
Mit 300 Stundekilometer jacht er de Ball uff de Platz
un gewinnt doch glatt fast jeden Satz.
In Wimbelde hot mer so in Erfolg gesehe
der konn doch aach de Mäckenro ummähe.
Es is net James Bond, es is mehr en Dicke
der muß mol schnell in die DeDeer abricke.
De Zimmermann in Bonn der muß doch baal schnalle
das es aach im Weste Leit gibt, die gen Osten schwallle.
Mit de Weltgeschichte losse mers jetzt soi
mer gehn in unser Ort enoi.


Drum Kellner ...



Ihr liewe Leit, ei is net me schee
aach in Kinsteere hon mer en OB.
Vor korzen hat er soi Heisje renoviert
un mit roter Farb verziert.
Doch die Farb, die er hot genumme
is aach bei viele Leit uff die Fahrradreihe gekumme.
E bissje geschwätz un dumm Zeisch gelabert
schun hot er dir de Drohtesel vollgesabert.
Mer hoffe er is jetzt net bess der liewe Mann,
dann mer so in froh, daß es noch Leit gibt,
mit dene mer schwetze kann.

Drum Kellner ...

Ihr Leut mir hon in unserm Örtschje
endlich aach a emol a Märktschje.
So a Märktschje is doch mol was scheenes
weil mer kriegt dort dies un jenes.
Ach was gibts do viele Ständ
un die Bauern reiwe sich die Händ
wenn mer kauft on ihre Ständ.
De Metzjer verkaaft soi Lewwerworscht
de Bäcker stillt de Brötcherdorscht.
Kinsteerer Markt is sehr beliebt
weils dort viel zu tratsche gibt,
un mir saaches hier ganz offe
das mir seun donn sehr betrouffe
falls des Märktschje net me is,
weils e prima Sache ist.



Drum Kellner ...

Des Vereinslewe in Kinsteere is wirklich e Trauer,
vun weitem siehts gut aus, doch guckt mer genauer
kocht jeder soi Süppschje un nix geht gemeinsam
un will mer was mache, dann steht mer ganz einsam.
Mer all wollte next Fassnacht e Bällschje uffziehe
doch es war koan Verein uff die Boa zu krieje.
De Turn-, Xsangs- un aach annern Veroi warn debei,
kaum gings in die Endphas, do was dann vorbei.
Die Fußballer un mir Kerweborsch warn de klägliche Rest,
die annern wollte feiern ihr eigenes Fest.
Im halbvolle Saal feiern, des is doch ko Stick,
drum mache mers doch zusamme, do hon mer me Glick.

Drum Kellner ...

Es fuhr sehr long in unserm Ort
 en Mann erum mit seum Rekord.
 Mit dem grinne Blitz is er dorsch die Gasse gezuckelt,
 am End vum Auto is de Ohänger geruckelt.
 Die Zeit, die er braucht um zur Stogar zu kumme,
 do seun annern schon noch Australie geschwumme.
 Die Staus hinnerm konnten net störn
 weiß er muß jo grad wirrer soi Zigar verzehrn.
 Doch die Zeiten seun leider vorbei, ach o weh
 jetzte fährt er nämlich en blaue Be Em We.
 Ich sehs schon kumme, jetzt mißt ihr uffpasse
 un eier Kinner net me Uff die Gass enauslasse.
 Wenn er bei 5 Ka Em H sagt, im Fuß tuts mich jucke
 jetzt fahr ich mol 10 un tu em Tod ins Ogesicht-gucke,
 dann werd der Mann zum reißende Tier,
 drum wenn ern seht, nix wie noch Haus
 un de Schrank vor die Deer.

Drum Kellner ...



Im Ortsbeirat die Paragraphereiter
 die schicke alle Theme weiter.
 Ham se vum redde aach schon en Bart
 zum Schluß schicke se alles doch nur an de Magistrat.
 Is de Absatz C zum x-te mol besproche
 jeder muß uff seiner Meinung poche.
 De Bismarckplatz kann e Liedsche vun singe
 seit 1956 wollt die Stadt ihn uff Vordermann bringe.
 Wenn des so weiter geht ihr liewe Leit
 dann bleibt er so für alle Zeit.
 Wan mer aach zu Risselsen gehern
 mer so in doch all Kinsteerer Bärn.
 Mer hoffe das do bald emol was geschieht
 sunst schicke mer aich ins tiefste Ried.

Drum Kellner ...

Es is net long her, do ging a Fraa spazieren
mit ihm Hund, der muß emol kotieren.
Sie lief do entlang am Horlachgrawwe
do sieht se en Mann ihr entgejelaafe.
Der tut ganz ernst una aach schee beflisse
un machtse zur Sau weil ihm Hund hot geschisse.
Der hot die Sach ganz genaa notiert
wann un wo un wie passiert.
Un dann läßt er noch en Hammer los
der Fraa ihr Aache wern ganz groß,
er segt wenn des nochmol passiert
setzt er aach en Haufe vor ihr Deer.
Der geilts sich do uff an em Häufsche Kot
seun Name reimt sich net nur uff des Wörtsche Kot.

Drum Kellner ...

Moin Spruch vun de Ereignisse is rum
un manche vun aich gucke dumm.
Hert zu ich sags aich lieve Leit
ihr hobt e ganz Johr jetzte Zeit
um dumme Sache o zurichte
aus dene mir des Sprüschje dicht.
Heut owend gehts im Saal dann weiter
drum kommt un feiert mit uns heiter
dann losse mir die Wutz enaus
un gehn erst mojens frie noch Haus.

Drum August hach jetzt uff die Trummel
un weiter gehts im Kerverummel.

